

Bosna i Hercegovina
Fedracija Bosne i Hercegovine
TUZLANSKI KANTON

KANTONALNI SUD U TUZLI

Broj: 003-0-Su-25-000 359

Datum, 01. oktobar 2025. godine

**SAOPŠTENJE ZA JAVNOST
O PREDMETIMA RATNIH ZLOČINA
ZA PERIOD OD 01.01.2025. GODINE DO 30.09.2025. GODINE**

U Kantonalnom sudu u Tuzli do 30.09.2025. godine nije došlo do promjene u pogledu broja predmeta ratnih zločina, jer se prema evidenciji ovog suda nalaze evidentirana dva predmeta ratnih zločina i to broj 03 0 K 011847 16 K 2 i broj 03 0 K 012459 14 Kps, koji nisu aktivni, jer je optuženo, odnosno osumnjičeno lice nedostupno.

U predmetu broj 03 0 K 011847 16 K 2 protiv optuženog B.M., zbog krivičnog djela – Ratni zločin protiv civilnog stanovništva iz člana 142. stav 1. preuzetog Krivičnog zakona SFRJ, optuženi se nalazi u bjekstvu i prema podacima ovog suda nalazi se na teritoriji Republike Hrvatske, radi čega je u ovom predmetu raspisana potjernica, jer oštećena u ovom predmetu nije se saglasila da se predmet radi krivičnog gonjenja ustupi pravosudnim organima Republike Hrvatske. Sve dok optuženi ne bude priveden po potjernici ovom sudu, ne postoji mogućnost bilo kakvog rada na ovom predmetu. U ovom predmetu sud je putem međunarodne pravne pomoći od Republike Hrvatske, gdje se optuženi nalazi, tražio podatke o prebivalištu optuženog, ali do danas ti podaci nisu dostavljeni ovom sudu. Ponovo je urgirano postupanje po zahtjevu za dostavljanje podataka Ministarstvu pravde Bosne i Hercegovine dana 23.04.2025. godine, a prema dopisu dostavljenom ovom sudu od strane Ministarstva pravde BiH od 29.04.2025. godine slijedi da još nije dostavljen odgovor na podnesenu urgenciju na zamolnicu od strane Ministarstva pravosuđa Republike Hrvatske.

U predmetu broj 03 0 K 012459 14 Kps, protiv osumnjičenog M.T., zbog krivičnog djela – Ratni zločin protiv čovječnosti iz člana 172. stav 1. tačka a) i h) Krivičnog zakona Bosne i Hercegovine, u vezi sa članom 29. istog Zakona, osumnjičeni je po potjernici lišen slobode i nalazi se pred pravosudnim organima Republike Srbije, koji će prema obavještenju koje je dostavljeno putem Ministarstva pravde Bosne i Hercegovine ovom sudu dana 10.05.2022. godine, do konačne odluke bilo o izručenju Bosni i Hercegovini ili o ustupanju krivičnog gonjenja Republici Srbiji, se nalaziti u pritvoru po rješenju Višeg suda u Beogradu, a koji pritvor je odredio sudija za prethodni postupak tog suda. Do danas ovaj sud nije obavješten o daljem toku postupka, iako smo nekoliko puta urgirali postupanje putem Ministarstva pravde Bosne i Hercegovine pravosudnim organima Republike Srbije. Urgirali smo postupanje po zahtjevu ovog suda koji je

dana 03.07.2023. godine dostavljen Ministarstvu pravde BiH. Ministarstvo pravde BiH je dana 18.09.2023. godine obavijestilo ovaj sud da je zahtjev Kantonalnog suda u Tuzli proslijeđen Ministarstvu pravde Republike Srbije na postupanje, te da očekuju njihovo izjašnjenje, o čemu će obavijestiti ovaj sud. Naredna urgencija dostavljena je dana 20.12.2023. godine Ministarstvu pravde BiH da provjere da li je okončan postupak pred Apelacionim sudom u Beogradu u odnosu na osumnjičenog. Ministarstvo pravde BiH dostavilo je ovom sudu akt dana 08.01.2024. godine kojim sud obavještavaju da su ponovo tražili informaciju od Ministarstva pravde Republike Srbije da li je postupak pred Apelacionim sudom u Beogradu okončan, te da će po dostavljanju tražene informacije o tome obavijestiti sud. Posljednja urgencija je dostavljena od strane ovog suda Ministarstvu pravde BiH dana 17.03.2025. godine, ali od Ministarstva pravde BiH sud je obavješten dopisom od 25.03.2025. godine da još nisu dobili izjašnjenje, niti da je postupljeno po zamolnici, od strane Apelacionog suda u Beogradu.

U oba predmeta, sudije koje su zadužene predmetima, redovno prate da li postoje procesno – pravne pretpostavke za uzimanje predmeta u rad, ali do sada se te pretpostavke nisu ispunile.

PREDSJEDNICA SUDA

Indira Hadžimehmedović